

Historia di himno

E origen di e cantica Aruba dushi tera ta data desde 1951 tempo cu nos conocido genionan musical, sr. Rufo Wever y Padu Lampe, a colabura y graba e ritmo y melodian tipico di Aruba. Na 1952, sinembargo, sr. Rufo Wever y sr. Padu Lampe a dicidi pa compone un pisa original cual ta representa e esencia di e amor di e Arubiano pa su pais. Esaki a resulta den e cancion "Aruba Dushi Tera". E grupo De Trupialen bou guia di Frère Alexius a contribui pa haci e cantica asina popular te cu na 1954, en cooperacion cu Radio Kelkboom, a graba e cantica aki pa prome biaha riba LP pa preserv'e pa posteridad.

Den decada di 70, segun e anhelo di e pueblo Arubiano a aumenta pa tin libertad politico y un gobierno propio, a surgi necesidad pa tin simbolonan nacional pa expresa su identidad y su lucha pa libertad.

Gobierno a instala un comision, consistiendo di sra. Maybeline Arends-Croes, Sr. Rufo Odor, sr. Padu Lampe, sr. Eddy Bennet, Sr. Hubert "Lio" Booi y sr. Rufo Wever, cual a unanimamente a recomenda pa accepta "Aruba Dushi Tera" como himno nacional. Pa completa e himno a inclui acerca un couplet mas, pa rindi homenage na e cordialidad di e hende di Aruba y su amor pa libertad. Cu e couplet final aki, componi pa Sr. Lio Booi, nos himno nacional a keda aproba den parlamento riba 16 di maart 1976.

ARUBA DUSHI TERA a keda presenta na publico pa prome biaha como nos himno nacional riba 18 di maart 1976, durante un presentacion den stadion Wilhelmina (awor Stadion Guiermo Trinidad) bou guia di sra. Maybeline Arends-Croes cu acompañamiento di orkestra filharmonico di Aruba conduci pa sr. Joy Kock.

Aruba Dushi Tera

- 1 Aruba patria aprecia,
Nos cura venera,
Chikito y simpel bo por ta
Pero si respeta.
- Refran
O, Aruba, dushi tera,
Nos baranca tan stima
Nos amor pa bo ta asina grandi
Cu n'tin nada pa kibre!
- 2 Bo playanan tan admira
Cu palma tur dorna,
Bo escudo y bandera ta
Orguyo di nos tur.
- Refran
O, Aruba, dushi tera,
Nos baranca tan stima
Nos amor pa bo ta asina grandi
Cu n'tin nada pa kibre!
- 3 Grandesa di bo pueblo ta
Su gran cordialidad,
Cu Dios por guia y conserva
Su amor pa libertad!
- Refran
O, Aruba, dushi tera,
Nos baranca tan stima
Nos amor pa bo ta asina grandi
Cu n'tin nada pa kibre!
Cu n'tin nada pa kibre!

Historia y simbolismo di nos bandera

Dia 21 di januari 1976 un comision nombra dor di gobierno a organisa un concurso pa un diseño di bandera. A participa casi 7000 diseño y a resalta e deseo pa tin un strea di 4 punta y e colornan cora, blou, blanco y geel. E comision cu consejo di "Flag Research Institute" a finalisa e diseño di nos simbolo nacional.

Tabata riba 16 di maart 1976 tambe cu parlamento di Aruba a aproba e diseño final y dos dia despues riba 18 di maart 1976 a presente pa prome biaha na publico hunto cu nos himno nacional.

E blou ta simbolisa e lama inmenso cu ta rondona nos isla cual ta indica pa e strea cora y blanco. E posicion di e strea ta ta mustra e anhelo di nos pueblo pa libertad y e strepinan ta representa un aruba liber y cu status apart.

E strea di cuater punta ta simbolisa e cuater direccionnan di e compas y for di cual tur e 40 paisnan for di cual ciudadanonan di Aruba a bin pa biba na Aruba den forma harmonioso y den libertad.

E strea cora cu rand blanco ta representa e pasion intenso di cada ciudadano pa su isla y e sanger cora cu a ser derama den su historia pa su libertad.

E color blanco ta e sinceridad di nos hendenna y tambe nos playanan blanco cu tanto local como bishitante ta admira.

Historia y simbolismo di nos escudo

Aruba tin un escudo oficial desde, 15 di november 1955. Diseña na hulanda, gobierno di Aruba a aproba e Escudo cu ta representa Aruba simbolicamente. E escudo ta consisti di cuater espacio, separa pa un crus rondona pa ramanan di laurel y ariba pa un leon. Cada espacio tin un figura den dje. E espacio na man robez ariba ta blau y ta contene un mata di aloe na color di oro. E espacio ariba na man drechi ta color di oro y ta contene un cero triangular berde cu ta Sali ariba seis (6) ola y etical cu ta varia di ariba bai about entre blou y plata (cuminsado cu blou). E espacio na man robes parti about ta color oro y tin dos man apretando otro den color cora. E espacio na man drechi ta color cora y ta contene un timon di plata.

E mata di aloe ta simbolisa un di nos prome fuentenan di bienestar di nos pais, referiendo na e industria di aloe. E cero di hooiberg cu ta sali riba e lama blou ta representa e identidad di nos isla cu ta sali for di lama blou Caribe. E color berde ta representa e abundancia di alegria cu a surgi na momento di a haya su autonomia, saliendo vencedor ariba tur e e olanan cu ta representa e lucha constante pa libertad y progreso. E dos mannan den abraso di amistad ta representa e lasonan amistoso y e cordialidad cu nos pais semper a tene cu tur otro nacion y pueblo, tanto riba nivel politico como economico. E timon ta simbolisa nos industrialidad cu a duna guia na nos fuente di bida mas importante di nos isla. E cruz di plata ta representa nos Devocion y Fe cu ta cubri henter nos existencia. E leon cu ta tene guardia ariba e escudo ta simbolisa e forza y generosidad, calidadnan cu nos ta balora y ta enfatisa den e color cora di nos pasion ferviente. E rama di laurel ta simbolisa pas y amistad, balornan di nos cultura.